

Despues di a duna comentario publicamente

Awor Mambo y ATIA ta bay conoce Plan Raoul

* Raoul identifica cu Downtown Management ta orador

* Raoul of Gobierno ta dicidi den caso Caya Grandi?

ORANJESTAD(AAN)
Lo a spera cu ta Gobierno ta informa Comercio kico e ta bay haci cu alma di e pais. Sin embargo, ta Raoul Cohen Henriquez, kende ta worde identifica awor como Downtown Management, cu ta number di e organizacion di Willemstad, Curacao, ta bay haci presentacion na ATIA y Mambo di su proyecto. Un situacion sumamente inusual, mas ainda teniendo na cuenta cu ATIA ta un organizacion di tur comerciante di Aruba y no di Caya Grandi so y mester a worde acerca door di Gobierno pa na forma independiente studia e proyecto y su consecuencianan pa henter Aruba.

Mientras Camara di Comercio a pone su mes na altura di e Plan Raoul y a emiti un comunicado hopi imparcial, awor Mambo cu ta representa ni mitar di e comerciantenan di Caya Grandi y ATIA cu ta e organizacion di tur comerciante na Aruba, ta manda hunto un invitacion na nan miembronan pa nan acudi na un anochi informativo tocante "e futuro di downtown Oranjestad".

E impresion ta worde crea, cu ya e Plan Raoul ta un realidad y ta futuro di Caya Grandi, mientras Camara di Comercio na un forma responsabel a mustra cu tin asuntonan cu mester mira bon den e proyecto aki y hasta ta inusual.

E reunion lo tuma lugar Diahuebs na edificio di ATIA y por a spera cu ATIA mas bien lo a reuni cu Camara di Comercio riba e asunto aki pa hunto puntra Gobierno pakico no a reconoce nan como e instancianan di Comercio di Aruba tur e tempo aki y den un secrecia total, a atende e asunto aki.

Ademas ATIA, promer cu permiti Raoul so bin presenta su plan sin duda na su favor, mester a busca e documentonan mescos cu DIARIO a sa di haya nan, pa por a studia nan y mira e

puntonan cardinal, hasta peligroso y inusual di e negoshi cu Raoul kier haci cu su compania cu lo ta e poder legal di Caya Grandi.

ATIA a opta pa hunto cu Mambo bay tene un encuentro di comerciantenan y durante e anochi placentero laga Raoul Cohen Henriquez di Downtown Management, manera nan mes ta bisa, bin splica kico lo ta futuro di Caya Grandi. Manera DIARIO a relata den un edicion anterior, Downtown Management ta un organizacion di comerciantenan di parti di Willemstad, cu no tin ningun tereno na erfpacht na Curacao y no ta encarga cu edificionan cu ta resorta bau un organizacion gubernamental, cu ta restora Willemstad.

"The future of downtown Oranjestad" ta duna Raoul

palabra, mientras por a spera cu ATIA y Mambo lo a acerca Ministro di Infraestructura Marisol Lopez Tromp, pa puntre kico ta su plannan cu henter Oranjestad, manera hasta Camara di Comercio a trece dilanti.

Interesante ta, cu no ta e directivanan di ATIA y Mambo ta bay busca informacion pa nan por informa nan miembronan y si nan no ta di acuerdo tuma pasonan pa Gobierno no comete fayonan cu lo afecta henter comercio y crea hasta precedentenan serio, pero cu a dicidi cu ta laga tur miembro bin come y bebe mientras ta scucha Raoul.


Por conclui cu Camara di Comercio a demostra madurez y tambe conocimiento di con atende cu asuntonan asina

importante, mientras ATIA y Mambo cu ya a duna Raoul bendicion sin conoce e proyecto, cu ta pone Raoul hasta riba autoridad di Banco Central, ta tene un tipo di happy hour pa Raoul bisa loke e kier bisa.

Cu Mambo, cu tin su interes den Caya Grandi ta actua di e forma aki, ta aceptabel. Pero ATIA ta un entidad serio, cu mester a busca comunicacion cu Gobierno pa na number di su miembronan di henter Aruba, informa su mes kico Gobierno su plannan ta.

E presentacion di e Plan Raoul den forma di un tipo di happy hour, envez di den un grupo di estudio di e proyecto, ta duna mas motibo pa controversia. Mas ainda pasobra ta parece cu e plan a haya bendicion di Gobierno, cu ta laga Raoul dicidi kico ta pasa cu Caya Grandi.

BIG FISCH TAMBE POR SHWATA!!



BEST DEAL

Tel. 5827100

(Pariba di Aruba Bank, Paradera)

AGENDA PA SKOL
SPECIAL PRIJS

